

佛說八佛名號經

隋北天竺三藏法師闍那崛多譯

如是我聞一時佛在舍衛國祇樹給孤獨園與大比丘僧千二百五十人俱復有大乘衆菩薩摩訶薩十千人俱爾時世尊與無量無數百千萬衆前後圍繞而爲說法爾時尊者舍利弗於大衆中即從座起偏袒右肩右膝著地向佛合掌而白佛言世尊我有疑心今欲發問惟願如來憐愍衆生爲我解說爾時世尊告舍利弗言善男子隨汝所問若有疑心吾當爲汝分別解說時舍利弗蒙佛印可許決疑網歡喜踊躍即白佛言世尊頗有現在十方世界諸佛世尊往昔願力常爲衆生現在說法彼諸如來所有名號若善男子及善女人欲得誦持此諸佛名若讀若聞及以

書寫緣是功德知三便於阿耨多羅三藐三菩提十六得不退轉無所缺減至於無上正真之道速得成於阿耨多羅三藐三菩提者不爾時世尊告舍利弗言善哉善哉善男子汝所諮問真妙辯才爲於來世無量衆生廣作利益慈悲哀愍一切天人能問如來如斯奧義是故汝今諦聽諦受善思念之吾當爲汝分別解說舍利弗言唯然世尊願樂欲聞爾時世尊告舍利弗言善男子東方去此過一恒河沙世界有一佛刹名難降伏於彼國土有佛世尊號善說稱功德如來至真等正覺於今現在爲諸大衆說微妙法復次舍利弗從此東方過二恒河沙世界有一佛刹名無障礙於彼國土有佛世尊號因陀羅相幢星王如來至真等正覺於今現在亦爲大衆說微妙法

復次舍利弗從此東方過三恒河沙世界有一佛刹名曰愛樂於彼國土有佛世尊號普光明功德莊嚴如來至真等正覺於今現在亦為大衆說微妙法復次舍利弗從此東方過四恒河沙世界有一佛刹名曰普入於彼國土有佛世尊號善鬪戰難降伏超越如來至真等正覺於今現在亦為大衆說微妙法復次舍利弗從此東方過五恒河沙世界有一佛刹名曰淨聚於彼國土有佛世尊號普功德明莊嚴如來至真等正覺於今現在亦為大衆說微妙法復次舍利弗從此東方過六恒河沙世界有一佛刹名無毒主於彼國土有佛世尊號無礙藥樹功德稱如來至真等正覺於今現在亦為大衆說微妙法復次舍利弗從此東方過七恒河沙世界有一佛

刹名罽塞香滿於彼國土有佛世尊號步寶蓮華如來至真等正覺於今現在亦為大衆說微妙法復次舍利弗從此東方過八恒河沙世界有一佛刹名妙音明於彼國土有佛世尊號寶華善住娑羅樹王如來至真等正覺於今現在亦為大衆說微妙法舍利弗是等諸佛如來至真等正覺如是佛刹清淨無穢無有五濁復無五欲其中衆生無有諂曲虛偽之心亦無欲行及以女人復次舍利弗若善男子及善女人得聞彼等諸佛世尊如是名號既得聞已能自受持讀誦修行復為他人宣揚顯說彼善男子及善女人若墮三惡道者無有是處唯除五逆誹謗正法及謗聖人復次舍利弗若善男子善女人得聞彼等諸佛世尊如是名號既得聞已能自受持

讀誦修行復爲他人宣揚顯說如是之人乃
 至菩提於其中間生生之處常具五通兼復
 速得諸陀羅尼六根完具無諸殘缺常得歡
 喜身毛右旋復次舍利弗若善男子及善女
 人得聞彼等諸佛世尊如是名號既得聞已
 能自受持讀誦修行復爲他人宣揚顯說彼
 等衆生所在之處縣官惡賊不能得便火不
 能焚水不能漂惡龍惡蛇不能毒害若行若
 住師子虎狼熊羆豹夜叉羅刹諸惡鬼神
 鳩槃荼等及人非人能作驚惶無有是處唯
 除宿殃復次舍利弗若有女人能厭其身繫
 念專心受持讀誦如是世尊諸佛名號復爲
 他人分別顯說壽終之後更復受於女人身
 者無有是處復次舍利弗若有善男子善女
 人於靜夜中能誦如是諸佛名號是等衆生

於現世間所作功業皆速成就日日增長無
 諸障礙爾時世尊欲重明此義而說偈言
 若有諸衆生 能持是佛名 悉捨諸惡道
 速生於善處 常在諸佛前 恒聞說妙法
 既覩無上尊 隨心而供養 誦持佛名故

超憶千萬劫 一切諸煩惱 疾速得菩提

若人滿十日 能誦是佛名 即得清淨眼

便能見諸佛 若有聞佛名 即能誦持者

隨其所生處 常爲他所敬 相好形端正

常生福樂家 喜心行大捨 聰明不放棄

若有諸女人 聞此佛名故 自誦爲他說

其福不可量 於此壽終已 必捨女人報

得受丈夫身 生生常利根 誦持佛名故

多百億劫中 口氣常芬馥 恒如栴檀香

彼等諸大仙 如是諸名字 若能誦持者

細心不放逸 誦持佛名故 父母及兄弟
并餘諸眷屬 終無異苦惱 誦持佛名故
一切魔波旬 黑闇衆眷屬 終不能障礙
惡毒不能害 刀杖水火等 縣官惡賊盜
一切不能傷 誦持佛名故 千億諸劫中
常生寶蓮華 威相神通具 常在虛空中
徧不思議刹 觀諸異佛土 刹中清淨者
證無上道已 普爲諸雜類 諸天及世人
能作歸依處

佛說是經已長老舍利弗及天龍夜叉乾闥
婆阿脩羅迦樓羅緊那羅摩睺羅伽人非人
等一切大衆聞佛所說歡喜奉行

佛說八佛名號經